



13. august 2021

UKA 2021/84

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Borgmesterinik borgmesterillu tulliinik kiisalu kommunalbestyrelsinut nunaqarfinnilu aqutsisunut ilaasortanik aamma najukkani ataatsimiititaliat ilaasortaannut il.il. akissarsiaqartitsineq pillugu Namminersorlutik Oqartussat nalunaarutaat nr. 25, 30. december 2013-imeersoq allannguuteqartitsinissamut Naalakkersuisut UKA2022-mut siunnersuuteqaqqullugit peqquneqarnissaannik Inatsisartut aalajangiiffigisassaattut siunnersuut. Allannguutissami ataatsimiititaliani siulittaasuusut qaavatigut akissarsiassaasussaagaluartut, kommunalbestyrelsimi ilaasortaasunut tamanut agguarneqarneqartussanngortillugit.¹

(Inatsisartunut ilaasortaq Aqqalu C. Jerimiassen, Atassut)

Tungavilersuut

Pissaaneq pinnguaanngitsoq tusartuarparput, inuttut iluaqutissaq pillugu sulinginnissaq Politikkerinngoraanni tusartuarparput.

Taakkulu oqaatsit tusartuartaqaagut, siammasissumillu suleqatigiittoqartariaqartoq partiit akimorlugit oqaasinnajupajalersimalluni. Taamaattorli kommunimut qinersisoqareereri tamassa takujualersimavarput amerlanerussuteqaqqalaaginnarluni suleqatigiiliorniartarnek, tamannalu sunik toqqammaveqarpa?

Partiit akorngini politikkip assigiinngippallaarneranik?

Naamik, kisiannili ataatsimiititaliani siulittaasuuffiit paarerusunnerinik, aningaasatigut tapit assigisaalu eqqarsaatingalugit, tassa imatut paasillugu, nammineq iluaqutissat.

¹ 1. Kommunit aqunneqarnerat pillugu Inatsisartut inatsisaat nr. 29, 17. november 2017-imeersoq:

” Imm. 2. Kommunalbestyrelsip aalajangersinnaavaa kommunimi ataatsimiititaliani ataavartuni siulittaasunut ilassutitut akissarsiaqartitsinissaq. ”

Borgmesterinik borgmesterillu tulliinik kiisalu kommunalbestyrelsinut nunaqarfinnilu aqutsisunut ilaasortanik aamma najukkani ataatsimiititaliat ilaasortaannut il.il. akissarsiaqartitsineq pillugu Namminersorlutik Oqartussat nalunaarutaat nr. 25, 30. december 2013-imeersoq

§ 5. Kommunalbestyrelsip kommunalbestyrelsimut ilaasortat aalajangersimasumik akissarsiaqartissavai amerlanerpaamik akissarsiap § 2, imm. 1-imi taaneqartup 1/6-ianik.



Tamannartaalu piinnarlugu pissaaneq siammasingaartunngorlugu pilersissinnaasaraluaq qataginnarneqartarpoq.

Ataatsimiitsitaliani siulittaasut immikkut tapeerutsinneqarneratigut, kommunalbestyrelsimili ilaasortanut tamanut siammarlugit akissarsiaasa aqqiviginerisigut angusaqarfiunerusumik ataqqeqatigiiffiunerusumillu sulineq ingerlasalersinnaangaluarpoq. Assersuutitut soorlu maanna Avannaata kommunia atulaaraanni, aatsaat taamak partiit amerlatigalutik siammassitsigisumik suleqatigiilernerat nutaarluinnaavoq, sulilu taamak ittut amerlanerulersinnaangaluarput akissarsiassat naamajunnaarlugit suliassalli naammassisassat isiginiarneqarnerulissallutik.

Aningaasatigut ingerlatsinikkullu pisortanut kingunerisassai:

Borgmesterinik borgmesterillu tulliinik kiisalu kommunalbestyrelsinut nunaqarfinnilu aqutsisunut ilaasortanik aamma najukkani ataatsimiititaliat ilaasortaannut il.il. akissarsiaqartitsineq pillugu Namminersorlutik Oqartussat nalunaarutaat nr. 25, 30. december 2013-imeersumut allannguutissamik suliaqarnissaq 500.000kr-nik akeqassasoq naatsorsuutigineqassaaq. Taannaavorlu AC-Fuldmægtigep ukiup ataatsip nalinganik sulinera.

Allannguutissat kommunit missingersuutaannut iluanaarutaanatillu annaasaqaataaffiussanngitsutut naatsorsuutigineqassapput. Naalakkersuisulli qanorpiaq aqqiinnissat apeqqutaalluni, siulittaasusartunut ullumikkut aningaasartuutaasartut pillugit.

Allannguutissami siulittaasut annikinnerusumik aningaasarsisalissapput, ilaasortalli tamarmiusut annerulaartumik qaffaavigineqarlutik.

Namminersortunut aningaasarsiornikkut allaffissornikkullu kingunerisassai:

Soqanngilaq.

Innuttaasunut aningaasarsiornikkut allaffissornikkullu kingunerisassai:

Soqanngilaq.